

PEMBERITAHUAN PERTANYAAN DEWAN RAKYAT

PERTANYAAN : JAWAB BUKAN LISAN

**DARIPADA : PUAN HAJAH NORMALA BINTI ABDUL SAMAD
[PASIR GUDANG]**

TARIKH : 7 OKTOBER 2014 (SELASA)

SOALAN :

Puan Hajah Normala binti Abdul Samad [Pasir Gudang] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah kes pembuangan dan penderaan bayi dan apakah program-program yang dilaksanakan oleh Kementerian bagi membendung perkara ini yang kebiasaannya melibatkan golongan ibu muda.

JAWAPAN:

Kementerian Pembangunan Wanita, Keluarga dan Masyarakat (KPWK) amat prihatin dan memandang serius akan kes penderaan kanak-kanak dan pembuangan bayi kerana kanak-kanak merupakan aset penting yang bakal mencorakkan masa hadapan negara.

Berdasarkan statistik Jabatan Kebajikan Masyarakat (JKM), kes penderaan kanak-kanak yang dilaporkan kepada JKJ bagi tempoh 2010 sehingga April 2014 adalah sebanyak 16,065 kes. Manakala bagi kes pembuangan bayi pula, berdasarkan statistik Polis DiRaja Malaysia bagi tempoh 2010 hingga September 2014 adalah sebanyak 446 kes .

Bagi menangani kes penderaan kanak-kanak, kerajaan telah melaksanakan pelbagai inisiatif yang melibatkan penggubalan dasar dan perundangan, penyediaan perkhidmatan sokongan serta pelaksanaan program advokasi.

Akta Kanak-Kanak 2001

Akta Kanak-Kanak telah digubal pada tahun 2001 bagi memelihara, melindungi dan memulihkan mangsa kanak-kanak. Mereka yang melakukan penganiayaan atau mendedahkan kanak-kanak hingga menyebabkan kanak-kanak mengalami kecederaan fizikal, emosi atau seksual boleh disabitkan di bawah Seksyen 31(1) Akta Kanak-Kanak 2001. Apabila disabitkan, pesalah boleh didenda tidak melebihi RM20,000 atau dipenjarakan selama tempoh tidak melebihi 10 tahun atau kedua-duanya.

Majlis Penyelaras Bagi Perlindungan Kanak-Kanak

Akta Kanak-Kanak 2001 juga memperuntukkan penubuhan Majlis Penyelaras Bagi Perlindungan Kanak-Kanak untuk menasihati menteri tentang aspek perlindungan kanak-kanak. Majlis ini mewujudkan Pasukan Perlindungan Kanak-Kanak (PPKK) yang dianggotai oleh seorang Pelindung (Pegawai Kebajikan Masyarakat) sebagai pengerusi, pegawai perubatan, pegawai kanan polis serta anggota masyarakat yang prihatin terhadap isu sosial yang melibatkan kanak-kanak. Fungsi utama PPKK adalah untuk menyelaras perkhidmatan setempat kepada keluarga dan kanak-kanak jika kanak-kanak memerlukan atau disyaki memerlukan perlindungan. Pada masa ini terdapat 134 buah PPKK di seluruh negara.

Dasar Perlindungan Kanak-Kanak

Kerajaan telah menggubal Dasar Perlindungan Kanak-Kanak pada bulan Julai 2009 untuk memastikan kanak-kanak mendapat perlindungan sewajarnya. Dasar ini turut memastikan komitmen menyeluruh diambil oleh semua pihak, termasuk ibu bapa atau penjaga kanak-kanak dalam melindungi kanak-kanak khususnya daripada sebarang bentuk keganasan mental dan fizikal, kecederaan, pengabaian, penderaan atau eksploitasi dengan menyediakan persekitaran yang selamat dan mesra kanak-kanak.

Pusat Aktiviti Kanak-Kanak

Selain itu, Pusat Aktiviti Kanak-Kanak (PAKK) telah ditubuhkan bagi menyediakan perkhidmatan sokongan dan advokasi kepada keluarga dan kanak-kanak berisiko tinggi dalam aspek penderaan dan pengabaian. Kini terdapat 149 PAKK di seluruh negara yang memberi perkhidmatan kepada 20,000 orang kanak-kanak. PAKK menyediakan program berbentuk seminar, kursus dan bengkel serta intervensi yang berbentuk motivasi, bimbingan kaunseling dan sukan.

Khidmat Kaunseling

KPWKM turut menyediakan perkhidmatan kaunseling kepada mangsa penderaan kanak-kanak bagi membantu mengukuhkan emosi dan psikologi mangsa penderaan kanak-kanak. Dalam hal ini seramai 183 orang Pegawai Psikologi di Jabatan Kebajikan Masyarakat (JKM), 2 orang Pegawai Psikologi di Jabatan Pembangunan Wanita (JPW), 16 orang Pegawai Psikologi di Lembaga Pembangunan Penduduk Keluarga Negara (LPPKN), serta 51 orang Panel Kaunselor di bawah penyelarasan LPPKN sentiasa bersedia untuk membantu kanak-kanak dan ahli keluarga apabila berlaku kes-kes traumatik.

Rumah Kanak-Kanak

Bagi kanak-kanak yang menjadi mangsa dera, JKM turut menyediakan 12 buah Rumah Kanak-Kanak di seluruh negara untuk memberi perlindungan kepada mereka.

Pasukan Pencegahan Penganiayaan dan Pengabaian Kanak-Kanak (SCAN TEAM)

Selain itu, kerajaan memperkenalkan *Scan Team* di 34 buah hospital kerajaan di seluruh negara. Pasukan ini berperanan khusus untuk

mengendalikan kes penderaan dan penganiayaan kanak-kanak dan dilaksanakan di hospital Kementerian Kesihatan Malaysia yang mempunyai Pakar Pediatrik.

Talian Nur 15999 dan Childline

Pada tahun 2007, KPWKMM telah memperkenalkan perkhidmatan Talian Nur 15999. Talian ini membantu untuk memudahkan orang awam dan mangsa penderaan kanak-kanak membuat aduan dan mendapatkan khidmat nasihat.

Seterusnya, pada bulan November 2010, KPWKMM telah memperluaskan perkhidmatan Talian Nur 15999 dengan mewujudkan talian khusus bagi aduan kanak-kanak iaitu *Childline* 15999. Talian ini merupakan talian tambahan bagi memberi perkhidmatan kaunseling kepada kanak-kanak dan bertindak sebagai perantara untuk menangani kes penganiayaan kanak-kanak. Sejak dilancarkan pada November 2010 hingga 31 Ogos 2014, talian ini telah mengendalikan sebanyak 12,108 panggilan.

Program Advokasi

Bagi mengukuhkan usaha untuk menangani masalah penderaan kanak-kanak, KPWKM melalui JKM dan Lembaga Penduduk dan Pembangunan Keluarga Negara (LPPKN) telah melaksanakan pelbagai program advokasi kepada masyarakat di semua peringkat dengan kerjasama agensi-agensi kerajaan yang lain dan NGO. Kerajaan telah mengenal pasti beberapa punca utama terjadinya kes penderaan kanak-kanak seperti perbalahan antara keluarga, kekurangan kemahiran keibu bapaan, tekanan kewangan dan lain-lain lagi. Sehubungan itu, program advokasi telah direka bagi tujuan mengurangkan penderaan kanak-kanak dalam masyarakat. Antara program yang telah dilaksanakan ialah:

- i) Kursus Pra perkahwinan SMARTSTART LPPKN. Sebanyak 567 kursus telah dilaksanakan dengan melibatkan penyertaan seramai 21,210 pasangan dari tahun 2006 hingga Julai 2014. Program ini dijalankan dengan kerjasama Jabatan Pendaftaran Negara, NGO dan badan-badan agama.

ii) Program Keluarga@Kerja (*Parenting@Work*). Sebanyak 649 program telah dilaksanakan dari tahun 2008 hingga Julai 2014 dengan melibatkan penyertaan seramai 27,765 orang ibu bapa.

iii) Kursus Ilmu Keluarga@LPPKN. Sebanyak 11,032 kursus telah dilaksanakan pada tahun 2008 hingga Julai 2014 dengan melibatkan penyertaan seramai 1.26 juta orang peserta.

KPWKM turut mengambil langkah-langkah dalam usaha mengatasi masalah pembuangan bayi seperti berikut:

i. **Dasar dan Pelan Tindakan Pendidikan Kesihatan Reproduksi dan Sosial Kebangsaan**

KPWKM telah menggubal Dasar dan Pelan Tindakan Pendidikan Kesihatan Reproduksi dan Sosial Kebangsaan yang dipersetujui oleh Kerajaan pada 6 November 2009. Dasar dan Pelan Tindakan ini bertujuan untuk meningkatkan kesedaran dan pengetahuan di kalangan masyarakat terutama ibu bapa dan remaja berhubung

daripada pelajar sekolah berasrama penuh (SBP), penghuni institusi JKM seperti Sekolah Tunas Bakti (STB), Taman Seri Puteri (TSP), Rumah Kanak-Kanak (RKK) dan Asrama Akhlak (AA), remaja dan ibu bapa yang di kawasan Program Perumahan Rakyat (PPR). Usaha ini merupakan pencegahan awal kepada golongan berisiko tinggi. Sebanyak 3 latihan Kejurulatihan (TOT) telah dilaksanakan kepada Pegawai Pelaksana LPPKN, JKM dan Guru SBP seluruh negara. Sebanyak 13 program di institusi JKM dan SBP serta 4 program yang melibatkan remaja dan ibu bapa di kawasan Program Perumahan Rakyat (PPR) yang berisiko tinggi di lembah kelang telah dikenal pasti dilaksanakan pada bulan November ini sebagai program rintis.

Sebagai kesimpulan, KPWKMM amat prihatin akan isu penderaan kanak-kanak dan pembuangan bayi. Pelbagai program telah dijalankan oleh kementerian dan agensi-agensinya di bawahnya. Walau bagaimanapun, usaha berterusan dan kerjasama bersepadu daripada semua pihak iaitu agensi kerajaan, sektor swasta, pertubuhan bukan kerajaan, ahli akademik dan setiap anggota masyarakat diperlukan bagi membanteras kes penderaan kanak-kanak dan pembuangan bayi di negara ini.